

**Zeitschrift:** Die Berner Woche  
**Band:** 38 (1948)  
**Heft:** 2

**Artikel:** D's originellschte Agebot  
**Autor:** Niehaus, Rösli  
**DOI:** <https://doi.org/10.5169/seals-633104>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 05.04.2026

**ETH-Bibliothek Zürich, E-Periodica, <https://www.e-periodica.ch>**

# D's originellschte A<sup>A</sup>gebot

Von  
Rösli Niehaus

Es isch usgänds Jänner im Nünzäni gsi. Es paar Tag lang het's gscheit gha, dass alli Hüser wyssi Hube treit hei. Sogar die arme blutte Chindli, wo der Chindli-frässer für ne grössere Appetit het uf-gschpart gha, sy zuedeckt gsi. Me hätt also ohni z'tschudere dert verby chönne. Aber me isch süsch lieber i der Stube blybe. Wäg'nächte hei d'Schneeschmützi dür d'Strasse zoge, a de Trottoirrand hei sich höchi Schneewäll bildet. Nachhär het d'Sunne -n-e chly füregüggelet, grad sövel, dass d'Dachtrauf hei afah rümele. We me bim Chüenzi - Locher über d'Gass het welle, het me zersch süferli e Blick obsi ta, ob ächt nid grad e chlyneri Louene z'dürab chömm. Und de isch me gleitig zäberlet und froh gsi, weme ohni umzfalle bim Rogg äne -n- isch gläntet. Ueber Nacht het du der Luft g'chehrt. Am Morge sy d'Gasse schpiegelglatt gsi, a de Trouf sy langi schpitzi Yschmadle ghanget und ds Tram isch wie uf Plattfüess uf de veryschete Gleis d'Marktass abzybet. Nume die, wo ds Güegi gschoche het, sy voruse, die andere sy alli froh gsi, daheim am Schärme z'blybe. -

Juscht a däm Namittag bin i ufbotte worde, für ds Y. hinde d'Grippepfleg z'übernäh. Es isch es chlys Näscht gsi, wo me nume mit der Bahn und de no mit der Poscht het chönne hicho. Der Befähl isch dringlich gsi. Drum ha -n- i alles, was öppe zu nere Schwöschtere - Montur ghört, ypackt und bi abzottlet. Es isch underdesse scho sächsi worde und e chly unghüürig isch es mir scho vorcho, won i so mueterseele allei z'Z. uf em fyschtere Bahnhöfli gstande bi und nid wyter gwüsst ha. Aber undereinisch chunnt e Gschalt us där fyschteri und i ha wenigschtens a de Hosebeine gseh, - sälbmal isch das no müglech gsi -, dass es Mannevolch isch. Nadisnah isch du no ne grosse Wallrosschnouz füre cho under -n- ere Chnubelnase, wo i der Heiteri sicher chupferig glüchtet hätt. Du isch mir ufange, das wärdi welewäg der Poschtillion sy, wo mi söll i mys Dorf bringe. Und so isch es gsi. Als einzige Passagier bin i i das alte Pöschtligstige, ha mi inen Egge drückt, die Dechene, wo so heimelig nach Rosstallgschmökkt hei, hani über d'Chneu ufezoge und d'Füess im warme Strou am Bode vergrabe. Ja, im warme Strou, und wie zu alte Zyte het es under däm Strou zwo grossi, volli Bettfläsche gha. So han i mi myne Gedanke überlah. Die sy nid grad rosig gsi. Es isch äben öppos ganz anders, öb me ime ne guet yrichtete Schpital pflegi oder so uf eme Dorf, bald hie, bald dert, i Hüser, wo me nid kennt und me nid weiss, öb me willkomme isch und me nes cha preiche.

Lang hani nid der Zyt gha, e Lättschzmache. D'Gutsche het e Ruck gmacht, der Schlag isch ufgrisse worde und i bi use gstolperet, fascht em Herr Pfarrer i d'Arme. Er het mir numen e mutze Gruess gä, aber wiene Plättsch Wasser us eme Gohn het er d'Chrankegschicht vom ganze Dorf über mi abeglärt und ersch, won er du sys unsichtbare Getzi het uf'd Syte

gestellt gha, hei mer chönnen abmarschiere. D'Chelti het eim wie mit Balke gäge d'Stirne ghämmeret, d'Strass isch glatt gsi und bi allem Ougenufrysse het me so weneli gseh wie imene Chemi. Drum het's mi e chli sträng dünkt, dass der Pfarrer mir alli syni viele Instruktioned a usse gäbi statt zwarte bis mir a der Wermi und Heiteri syge. Item, i ha du emel vernoh, dass i bim Schnyder husi, am Aend vom Dorf, won es sächs Lungenentzündige heigi. Ds einte Chind syg scho gestorbe und d'Frou ligi i de letschte Züge. De syg da no -n- e Grössätti, o sehr schwär chränk, aber drüberuse no -n- e unverbesserleche Schnapser. Abgeseh vo där Huusepidemie sött i de no zu de Chranken i de 4 Dörfer zringsetum luege. Der Dokter syg äbe schon e chly alt und mögi by däm Wätter onid grad meh so voruse wie n es jitz nötig wäri. Chumm han i mi trouet z'frage, wie viel de im Ganze chränk syge. Aber nadisnah han i du chönne zämezzelle, dass es ungefähre e chly meh als hundert Patiänte syge, wo me sött zuene luege. -

Währet däm sy mir dür ds Dorf düre wieder uf ds freie Fäld use cho und hei uf nen alte, einsame Burehof gha. Sys Dach isch fascht bis a Boden abe ghanget und d'Fänschter sy drunder verschwunde. Zum Glück het is kei Hund agruhret und drum han i chönne d'Türe sueche. Won i se ändlech gfunde gha ha, han i welle em Herr Pfarrer der Vortritt lah. Aber dä het nume lut i di Stockfyschterie ynebrüelet: "Si wär de da", het rächtsumkehrt gmacht und isch mit länge Schritte dervogstälzet. Es isch guet gsi, dass niemer gseh het, wie -n- i der Chopf schüttle und vor mi ane säge "nei aber o, wie chame -n- o so sy" won -er, ohni syne Schäfli nume -n- e guete Blick zgäh, wie -n- e grosse Gaagger über ds wysse Fäld heizuestiflet. Schpäter han i du vernoh, dass der Pfarrer e schützliche Angst vor der Grippe gha het, we scho sy eigetli Frou o dermit im Bett glägen isch.

So isch mir nüt anders übrig blybe, als mi sälber dür d'Chuchi z'schlingele und eme heitere Schyn nah die rächti Stubetüre z'finde und mi vorz'stelle. Das isch en eifachi Zeremonie gsi. Der Grossvater het mi us wässerige, underloufene Ouge agstumet und het von allem nüt begriffe. Under eme Dachbett hei zwöi Chinder gwundrig füreblinzel, e Bueb und es Meitschi. Si hei mi agluegt wie -n- es Tier im Zoologische, aber äbe, si hei halt no nie e "Ghübleti" gseh gha. Der Schnyder het sich Mueh ggä, im Bett ufz'sitze. Sys Biss het gchlefelet, so het ne ds Fieber geschüttlet. Er het nume mit sym biegsame Duume obsi zeigt, wie wenn er wetti säge, dert wär i jitz am nötigste. Drum bin -i d'Gadeschtägen ufe und was i da gseh ha, isch mi Tüüri trurig gnue gsi: D'Frou isch i där chalte Chammere tot im Bett gläge, scho blau verfärbt. D'Linne sy bruun und ufgeschprunge gsi und di wytoffene Ouge hei a d'Tili ufegetarret. Es het mi tuuret, dass i nere nümme ha chönne hülfe und mir nüt anders isch übrig blybe, als ere die paar Dienschte z'tue,

vo däne si nüt meh merkt. - Der Schnyder het allwäg scho gwüsst, dass sy Frou gestorben isch. Undereinisch isch sy Chopf i der Bodelucke erschine, und er het mer Awysige ggä, wie me hieume d'Lüt im Sunntigsstaat begrabi. Und de chönni de grad d'Matratze chehre und das Gliger für mi bruuche, vowäge, "ame -n- en Ort müess i ja schliesslech o sy", het er gemeint. Das han i no offe glah; won -i umegluegt ha, het's mi dünkt, nid nume z'Bett syg usuber, die ganzi Chammere hätt e Fägete nötig gha, wenn's überhoubt mit einere abgange wär. Und uf em Bode sy so allerlei Tierli umegloffe, won i nid uf der erscht Blick gwüsst ha, i weli Familie si ghöre, und d'Schpinnhuppele sy wie Vorhäng vo der Tili ghanget. Nei, da obe hätt i nid ohni wyteres welle huse. He nu, so hani halt agfange, die gueti Frou zwägzmache und azlege. Aber das het öppis bruucht, bis i dä styf Körper i die styfi Tracht ha ynezwängt gha. Grad wo mer vor Erlichterig e Süfzer etrümt, erschynt em Schnyder sy strubi Mähne no einisch i der Lucke. Mit der wenige Chraft, wo -n- er no gha het, het er grüeft: "halt, halt, wartit! Si het no -n- e Füfliber im Sack, dä muess i ha, dä darf nid undere Bode!"



Was han i anders welle als afah sueche, z'ersch i eim Gloschli, du im andere, du im Chittelsack und z'letscht no im Mieder. Aber kei Füfliber isch fürecho. Der Schnyder het's nid gloubt. Er isch toube im Bett abegläge dass d'Fädere gygset hei und het öppis gestürmt vo "i wärd däch o ne Sack ha." -

Währet däm Hin und Här het ds Vieh im Stall mordio brüelet. I ha destwäge nid länger Zyt gha, mit em Schnyder z'stucke, es het mi dünkt, so brüele d'Chüe nume wenn öppis Ungrads syg. Mi erscht Gedanke isch "Füür" gsi. I bi hurtig d'Gadeschtägen abe, voruse und dem Lärm nah gäge Stall gschprunge, für die Tier vo der Chetti z'lah. Won -i aber d'Stalltür uftue, wird's still. Mit em Taschelämpeli han i ipe zündtet, aber es isch nüt Lätzes umewäg gsi, als es paar Müs, won i mit em Liecht us der heimelige Wermi vo de Chüe ufgeschücht ha. Näbe däne beide Tier isch imene Verschlag es grosses Gusi gläge, es Mueter-tier. Es het grunzet und gnüelet, het sich ufgha und allwäg gemeint, es überchömi no -n- e Extramahlzyt serviert. Won -i aber gseh ha, dass alles i der Ornig isch, bin i umgeehrt und ha d'Türe zueta. Chumm awäg, isch ds Brüele wieder losgange. I der Chuchi han i du d'Stalllatärne gfunde und azündtet und bi wieder zrügg. Gründlech han i der ganz Stall abglüchtet und bi däm isch du my Blick a de vollen Uetter vo de Chüene ebhanget. Wohl, jitz het's mer taget. Verläge wie nid grad einisch bin i gsi und i hani im Aecke gchrauet und vor mi anegseit: "Was mache, keis Bei wo cha mäliche. Ghört de das o no zu de Funktion von ere Chrankechwöschtere? Mit Schyn Miera, so sygs, me cha's ja probiere, es gseht's de emel niemer, wie's usechunnt."

Us der Chuchi han i mir d'Mälchtere

und es alts Chischtli als Schämeli greicht. Underwägs bin i em Grossvater begänet, wo grad dra isch gsi, mit de Zündhölzli uf e Heustock z'gogere, für de Chüe ga Fueter abezgäh, Das hätt aber chönne fähle. I han e churzerhand wieder ids Bett gstosse und der Schlüssel umdräiht. Er het zwar gfutteret und Pfluegsredli vo Ouge gmacht und um nen ume het's eso gschmäpselet, dass me sich bsunne hätt, öb me ihm mit ere Cherze wel d'Nächti cho. Er isch nümme binenander gsi. Fascht hätt me sich vor ihm chönne förchte. Item, i bi du also zu de Chüene use. Es het mi glächeret, won i di Schätte gseh ha, wo d'Latärne a d'Stallwand zouberet het: unde isch es e Mälcher gsi mit der Stallruschtig, obe - n isch es e Schwöschter gsi mit der Hube. Alti Erinnerige sy mer ufkroche us där Zyt, wo mer albe bim Nachbar im Stall hei em Mälche zuegluegt und uf e chly Schuum gwartet hei. Aber das isch scho bald nümme wahr gsi und bi myr Usbildig isch weder d'Land - no d'Viehwirtschaft uf em Programm gstande. Ja nu, däm hani jitz nid chönne ertrünne, d'Chüe hei mi erwartungsvoll gmuschteret. Z'erscht bin i no lätz häre gsässe, aber i has no be no zyte gmerkt und d'Chue isch geduldig gsi. Alben einisch het si der Chopf gchernt, wie wenn si wetti säge: hesch es no nid bald erlickt. Meh aber het si der Chopf zu ihrem Gschpahne dräiht und es hätt mi nid gwunderet, wenn si mi verhandlet hätte. Und won i grad am beschte dran bi und scho fascht stolz, dass d'Milch überhopt chömm, überchumeni - tätsch! - e saftige Chlapf uf d'Backe. E Chlapf mit em Schwanz voll Mischzottle. Dä isch gsässe. I has gschpürt und gseh und gschmökkt. Aber i ha mi tröschtet, das sig allwäg myr Vermeidigung als Stalljumpfere und der zwöite Chue han i der Schwanz vorsorglich bezyte abunde. Si het mir's nid übel gnoh. Im Gägeteil, won i mit ihre o bi fertig gsi, het si mir mit ihrem grosse Muul über d'Achsle gstrichlet. wie we si mer wett es Aehli mache. Alli drü hei mer erlichteret ufgschnuufet, i na du no Heu abeggä, ha d'Mälchtere und d'Latärne gno u bi wieder is Huus füre zu myne zwöibeinige Schützlinge. Fascht bin i no übere Sarg stolperet, wo der Schryner ohni öppis zsäge, vor d'Huustüre gstellt gha het. Underwägs bin i e chly blybestah under em Vorschärm. Wie helmelig isch das doch, we me so i der Nacht vorusse steit und nume d'Stilli ghört, und die paar wenige Grütsch wo us de Ställ über d'Fälder chöme: es Ross wo wieheret, e Chue wo brüelet, e Chnächt, wo zum Brunne geit sich ga wäsche, oder ds Gyre vom ene Wage. wo men us em Remise usezieht. Niene, dünkts mi, ghörme ds'Erwache vom Tag so guet wie ur em Land und niene syg me so verbunde mit der Nacht und em Tag wie dert. Won i du wyt i der Ferni ha ghöre e Möntsch über die gfrorni Bschüssi rochle, han i dänkt, es wär für mi jitz Zyt, e chly ga z'nucke. Aber i ha geng no nid gwisst, wo lige und drum bin i ufe Ofetritt gsässe. Vo dert han i myni Patiänte under Ouge gha und ha mi chönne erwerme. Richtig bin i du ygnuckt. Aber undereinisch, wie uf Kommando, isch über mir es vielstimmiges Konzärt losgange.

(Fortsetzung folgt)



Blauer Himmel und strahlende Sonne, das ist das Wetter zum Bobrennen. Die Bobs stehen bereit, jeder hat seinen besonderen Namen oder ein Wappen

Die Fahrer bereiten sich auf das Rennen vor; manche sind aufgereggt und andere nehmen die Sache ruhig, wie das Bild zeigt

Wie der Skifahrer seine Skis pflegt, so pflegt der Bobfahrer seinen Bob, sonst ist der Sieg nicht sicher in der Tasche

# EIN Bobrennen FINDET STATT

Graubünden bietet nicht nur im Sommer den Feriengästen viel Schönes, sondern ist erst recht im Winter ein idealer Platz, um Ferien zu verbringen. Von den vielen Möglichkeiten, die es bietet, muss man auch Arosa und seine Bobbahn nennen. Bis noch vor wenigen Jahren wurden die Bobrennen allgemein als ein gefährlicher Sport angesehen. Doch diese Auffassung erwies sich als falsch, gab es doch in den letzten zwanzig Jahren nur zwei Unfälle mit tödlichem Ausgang. Dazu ist die Bobbahn in Arosa wirklich die ideale Piste mit ihrer Länge von 1800 Metern und ihren vielen wundervollen Kurven. Der Unterhalt der Bahn erfordert ausserordentliche finanzielle Aufwendungen. Im Gegensatz zu einer Skipiste braucht die Bobpiste eine sorgfältige Pflege.

Jedes Jahr finden in Arosa Bob- und auch Schlittelmeisterschaften statt. Viele, die im Sommer mit dem Auto umhersausen, wenden sich im Winter den Bobrennen zu, und können auf diese Art wieder die herrliche Spannung der Geschwindigkeit geniessen.

So haben es die Arosener verstanden, jedes Jahr viele Teilnehmer an die Bobrennen herzulocken und neben diesen Ereignissen finden auch Kurse für Anfänger statt, wo jedermann unter fachkundiger Führung lernen kann, mit 80 bis 100 Kilometer Stundengeschwindigkeit über die Bobpiste zu flitzen.

W. Rothmund.



Mitte rechts: Dann begibt man sich an den Start. Der grosse Moment ist gekommen! Sturzhelm und Knieschoner werden angelegt - man kann nie wissen. Oben: Während der Hintermann den Bob in Bewegung bringt, ist der Steuermann sich bereits bewusst, dass es nun ganze Konzentration braucht. Rechts: Ein Bob im vollen Schuss auf der Arosener Bobbahn

